

بِسْمِ اللَّهِ الرَّحْمَنِ الرَّحِيمِ

# Khutba Jummah

HAZRAT MUHYI-UD-DIN AL-KHALIFATULLAH

*Munir Ahmad Azim*

04 Mars 2016 ~  
(23 Jamad'ul Awwal 1437 Hijri)

**(Résumé Khutba)**

**Après ki li fine salué tous so bane disciples (et tous bane musulmans) entier le monde avec la salutation de paix dans l'Islam, Hazrat Muhyi-ud-Din (atba) fine lire Tashahhud, Ta'uz, Surah Al Fatiha, et li fine ensuite axé so Khutba Jummah lor « Calamités Naturelles Ou Punitions Divines ? »:**

## **CALAMITÉS NATURELLES OU PUNITIONS DIVINES ?**

Ki veut dire bane calamités naturelles d'après terminologie de l'homme ? C'est bane calamités ki en partie nous capave éviter et en partie ki nous pas capave éviter, et sa varié d'après l'intensité de la calamité en question, par exemples : bane tremblement de terre, tempêtes, la sècheresse, inondations etc. Zot classée en deux parties : (1) Bane tel calamités ki vini suite à conséquences de la main de l'homme. Par eg. Réchauffement de la Terre par bane l'effet de serre, par la pollution etc. (2) Bane tel calamités ki vini suite à la nature même de fonctionnement de la terre et de bane les ciels, kot parfois li prévisible (nous capave conner d'avance) et parfois imprévisible (ki nous pas attane sa pou tombe lor nous, lor bane dimounes).

En zot-même, bane calamités naturelles de par zot natures zot forme partie dans représentation (ou planification) général de bane kitchoses de sak la vie ki fine créé. Zot rôles dans sa plan là zot déterminant et zot ena ene sens. De ce fait, dans l'intérêt d'ene bien grand nombre de bane dimounes, certains tipti l'intérêts individuels zot souvent sacrifié au profit de la majorité de bane dimounes (ou bien de bane la vies en générales). Sa c'est ene principe ki zot tout accepté. A cause rôle important ki sa bane calamités là zoué dans la planification de bane kitchoses et dans le cheminement de la vie et progrès, alor nous pas capave considère sa bane calamités là comme vide de sens, selman parski détrois dimounes fine victimes de sa.

Zot pou capave mieux comprend la philosophie générale derrière sa bane calamités là si zot étudier le phénomène de la vie et de la mort – la lutte ki ene fer face à l'autre (la vie et la mort, la mort et la vie). Sak pas en avant dans l'évolution de la vie entraine des millions et des millions de victimes. Sakaine de sa bane l'étapes là provoque destruction d'ene nombre inestimable de bane créatures ki ena la vie. Nous capave trouver ki dans l'univers entier ena des millions (et même plisse ki nous capave compter) de bane espèces – bane créatures, bane signes de vie, bane différents formes de vie – et alor nous capave demande nous-même ki alor le but ultime de zot l'existence? Si ou réussi comprend couma bane kitchoses zot planifié, zot pou alle conné ki sa li coumsa afin ki zot servi l'homme et zot rôles alor c'est seulement pou servi l'écologie ki l'homme bizin. Tout sa c'est nek ene partie de sa processus là. Et de ce fait, le nombre li sacrifié dans l'intérêt de la qualité. C'est l'essence même de tout sa planification là. Si des milliards de vie sacrifié au profit de l'homme – ki représente l'être supérieur – afin pou augmente et réhausse so bane qualités et sa, après avoir subi bane test ou épreuve ki bizin passer – alors certains de bane sacrifices zot justifié pour sa grand planification de bane kitchoses là.

Mais à part sa, kan ou applique la situation de bane calamités dans le contexte de bane humains, de bane dimounes, alor ou pou comprend ki sa bane même calamités là ti capave évité ou réduire dans ene grand façon si bane dimounes, la race humaine ti à la hauteur de saki Allah attane de zot en ce ki concerne zot moral et zot sens d'humanité dans zot la vie de tous les jours. Alor, le fait ki sa bane calamités là ena zot but et zot direction, la question se pose, eski bane dimounes mérite saki zot pé gagner, ou tout simplement, eski zot mérite pou disparaite, pou détruire complètement après tout saki fine metté pou zot, à zot disposition pendant des milliards d'années ? Réponse là li simple : si ou zette ene ti coup d'œil lor saki Allah fine faire pour l'humanité, alor sa pou justifié kifaire bane dimounes bizin anéanti complètement, vu ki zot fine perdi complètement le sens du but de la création et fine montré zot hostile.

De ce fait bane calamités naturels ki transformé en bane punitions divines zot bane phénomènes ki pas daté d'aujourd'hui. Couma mo fine déza dire zot, kot mo fine explique zot la notion même de bane calamités naturelles, et pareil couma sa verset Quran là dire :

**« Calamité (ou Corruption) fine vine lor la terre et dans la mer ; bane actions dimounes même fine mérite sa, et Allah fine faire zot goûte (conséquence) ene partie zot propre actions. Peut-être ki zot va retourne (dans bon chemin, vers Allah). »** (Ar-Roum 30: 42)

Saki nous ena pou comprend c'est premièrement la philosophie visant à cerner bane causes réelles de bane calamités naturels. Telle couma l'homme comprend li, sa li ene zaffaire incomplet. Vraie cause là trouve bien loin dans l'histoire – des millions d'années de sa – couma

Quran faire nous comprend. Dans sa but là, Quran donne bane exemples de bane la villes et bane peuples ki fine détruire par saki bane dimounes conné comme d'habitudes couma bane catastrophes naturels, mais en vrai dire, la nature « naturel » de sa zarre de catastrophes là li disparaite pou faire bane dimounes trouve clair et ki zot prend conscience ki sa c'est pas bane zaffaires ordinaires, et ki c'est la colère d'Allah Le Tout Puissant ki pé manifesté à travers sa bane catastrophes ki d'habitudes pas très graves et naturels. Mais quand la colère d'Allah saizir ene la ville ou ene peuple ou mêmes bane nations/ pays en même temps de par le monde, alors sa bane catastrophes naturels là arrête prend nature de « naturel » et zot transformer en bane manifestations de colère et de punitions divines afin pou faire l'homme réfléchi lor gravité de la situation, lor zot propre incapacité de faire sa le monde là respirer ; ene tel lé monde ki Allah fine confié zot, et sa c'est principalement à cause le fait ki zot fine rezette la Vérité de l'Existence d'Allah et de So Rôle dans la création de l'homme et kot zot rezette aussi pou adore Li (Allah) et kot zot associé bane les autres divinités (bane fausses dieux) avec Li (Allah, Le Créateur).

Donc, vraie cause de sa li étendre en différents étapes durant toute la durée de l'évolution de l'homme. Donc, si nous guette pour ene moment en arrière, nous pou trouver ki sa bane manifestations de colère divine fine être ene bénédiction pour bane générations futures (pour bane dimounes ki fine vine après). Ene chercheur de vérité pou capave mieux comprend saki mo pé rode dire parski sa bane zarre de catastrophes intenses là zot manifester kan bane nations dévier de l'adoration exclusif d'Allah. Zot manifester aussi comme l'exécution de bane prophéties de bane Messagers d'Allah ki fine vini (dans le passé), ki aussi présent devant zot azordi et aussi bane (Messagers) ki pou vini (dans le futur) pour avertir bane dimounes de la colère d'Allah si zot pas retourne dans l'adoration exclusif du Dieu Unique.

Donc, sa bane calamités là servi à quelque chose. Pareil couma mo fine dire zot, zot zoué ene rôle capitale dans l'histoire de développement de l'homme ou celui de la vie. En plusse de sa, si ene peuple fine montrer li désobéissant envers Allah et So Messager, alors li ti pé subir conséquences de so bane actions.



Allah ena tout droit pou détruire toute l'humanité si sane-là pas rempli le but de la création. **De ce fait, sa bane la sécheresses ou inondation** (couma nous fine témoigner ici à Maurice depuis commencement de sa l'année là, kot ene après lotte fine ena bane grosses averses ki fine amène inondations et glissement terrain dans plusieurs l'endroits dans Maurice kot plisse ki 300 dimounes fine

bizin évacué zot la caze (*Référence: <http://floodlist.com/africa/mauritius-floods-february-2016-port-louis>*), et aussi tout récemment dans bane pays couma l'Inde, Pérou, Haïti, Indonésie, Brésil, Bolivie etc. ki fine victimes de bane inondations) **ki l'homme subir zot nek bane tipti punitions, en sommes bien tipti même et non pas dans mesure ki bizin, en dessous même de saki li mériter vraiment.** C'est pourquoi le Quran Shareef dire nous ki si Allah ti décidé pou puni bane dimounes couma bizin pour zot bane actions, alor Li ti pou anéanti tous bane formes de vies lor la terre. Sa c'est la philosophie du Quran.

Apparemment, ena certains dimounes ki, kan zot pense lor la question, kifaire bane zaimo innocents vine bane victimes pour bane crimes ki bane dimounes commette, alor sa pousse zot dans ene dilemme profond. Zot pas capave comprend sa. Mais selman verset 62 de Surah An-Nahl dans Quran Shareef apporte la réponse pou sa en ce ki concerne le but de la création de bane diverses espèces de vie – ki fine créé pour le bien de l'homme. De ce fait, si l'homme pas montrer li à la hauteur, alor tout sa ki fine créer bizin alor disparaite ensam avec li. Tout bizin disparaite et pas pou bizin reste kitchose. Allah dire :

**« Si Allah ti bizin maille dimoune pou tort ki zot faire, Li pas ti pou laisse ene sel être vivant lor la terre, mais Li donne ene délai ziska zot terme. Et kan zot l'heure arriver, zot pas pou capave avance li d'ene heure de temps, ni retarde li. »** (An-Nahl 16 : 62)

Ce ki veut dire ki si Allah ti bizin juge l'humanité pour so transgression, Li pas ti pou laisse aucaine espèce, aucaine signe de vie vivant lor la terre. Le but de la création de bane créatures ou espèces, c'est pour mette zot à la disposition de l'homme et alor kan l'homme arrête mérite sa contrôle ki li ena d'habitude lor le reste de la création – alor sa bane créations là aussi disparaite ensam avec li.

La Terre recevoir de temps à autre ene l'autre la vie en la personne d'ene Messenger d'Allah, ene avertisseur ki vini pour avertir bane dimounes de bane calamités futurs afin ki zot prend conscience de la gravité de la situation, afin ki zot délaisse zot bane mauvais actions et ki zot réforme zot physiquement, moralement et spirituellement. Sa trois formes de réformes zot importants pour li parski zot apporte li la quantité nécessaire de bane volontés pour dirige li vers so Créateur. De ce fait, même bane calamités vine pour li (l'homme) ene moyen pou prend conscience ki le monde pé faire face bane problèmes énormes, ki li pas pé tourner dans façon ki bizin, c'est-à-dire, ki kitchose pas pé fonctionner couma bizin, et alor ki li bizin prend bane action nécessaire avant ki li trop tard.

Les temps ki nous pé vive li alor l'image même du Jour du Jugement kot Allah renverse bane la terres et bane la mers, ainsi ki bane dimounes afin ki zot prend conscience de zot vrai devoir, zot vrai but lor la terre. L'heure li celui de la venue du Messenger d'Allah pour averti zot et de ce fait sak calamité ki dimounes qualifié sa comme « naturel » zot transforme en kitchose de

terrifiant parski derrière sa manifestation là ena la main d'Allah pour devire bane ki défier So bane l'ordres et So Messenger. **L'Heure critique**, parski la corruption partout. Tous bane nations et même bane religions oulé régner en maître lor la terre, et certains zot prêts à tout pour défier bane la loi divine pour établir zot propres la loi pareil couma pharaon à l'époque de Hazrat Moosa (as), Nemrod au temps de Hazrat Ibrahim (as), etc.

Sa soif de pouvoir mondaine là fine fer zot oublier zot vrai Bondié. De ce fait, couma Allah ti révèle moi : « **Arise & Create a New World (Lever, et Crée ene Nouvo Lé Monde)** », ce qui veut aussi dire ki le monde pé dirige li vers so propre destruction, et sa jour là pou vini kot Allah pou créer ene nouvo lémonde pour So bane vrais serviteurs, bane ki obéissant envers Li. Sa le monde là li ene le monde spirituel basé lor la foi et la confiance en Allah et So bane messagers. Mo nek ene maillon de médaille de bane élus d'Allah. Bane les autres pou vini après moi et ki pou manifester de moi (de mo Jamaat, ki pou croire dans moi), et le monde pou témoigne encore plisse bane renouvo parski si d'ene côté sa le monde là pé mort, mais li pou revivre d'ene l'autre manière. Li pou capave revivre seulement si bane dimounes obéir le code de loi, le Quran et suivre le vrai guide, le Saint Prophète Hazrat Muhammad (saws) et so bane députés, bane messagers islamiques ki vini seulement pour renforcer so mission et so véracité.

Ki Allah nous aide, la communauté de Hazrat Muhammad (saws) ki ene sel grand famille de bane musulmans ; alor ki Allah fer nous unie dans l'obéissance d'Allah et de So bane commandements afin ki nous capave remporte victoires en victoires pour la cause de l'Islam, pour la cause d'Allah (twa), le Dieu Unique et ki nous amène le monde, l'humanité pou prend conscience de zot bane erreurs et pou ki zot tourne zot exclusivement vers Allah et non pas bane fausses dieux. *Ameen.*